

四庫全書

史部

欽定四庫全書

史部

華陽國志卷十一

詳校官編修臣李潢

侍讀臣孫球覆勘

總校官中書臣朱鈐

校對官助教臣胡予襄

謄錄監生臣崔堂

欽定四庫全書

華陽國志卷十

晉 常璩 撰

後賢志

聞之善志者述而不作序事者實而不華是以史遷之
記詳於秦漢班生之書備乎哀平皆以世及事邇可得
而言也西州自奉聖晉後俊瑋倜儻之士或脩德讓行
止從時或播功立事羽儀上京策勲王府甄名史錄侔

於先賢會遇喪亂軋邁華夏顛墜典籍多缺族祖武平
府君愍其若斯乃操簡援翰拾其遺闕然但言三蜀巴
漢未列又務在舉善不必珍異揆之耆舊竹素宜闡今
更撰次損益足銘後觀者凡二十人綴之斯篇雖行故
墜沒大較舉其一隅

衛尉散騎常侍文立廣休

散騎穆穆誠感聖君

西河太守柳隱休然

西河烈烈秉義居真

漢嘉太守司馬勝之興先

漢嘉克讓謙德之倫

郫令州主簿常勗脩業

郫君謬諤自固底身

江陽太守何隨季業

江陽皎皎命世清淳

梓潼太守王化伯遠

梓潼矜矜在險能平

太子中庶子陳壽承祚

庶子稽古遷固並聲

漢中太守李宓令伯

漢中曄曄才蓋羣生

犍爲太守杜軫起宗

犍爲邛邛友于寔令

給事中任熙伯遠

給事溫恭尚德茂榮

中書郎王長文德雋

中書淵識寶道韜明

大長秋壽良文淑

長秋忠肅明允篤誠

大司農西城公何攀惠興

司農運籌思侔良平

少府成都威侯李穀允剛

少府果壯文武是經

衡陽內史揚邠岐之

衡陽固節隱然不傾

尚書三州都費立建熙

尚書準繩古之遺直

湘東太守常騫季慎

湘東汎愛仁以接物

武平太守常寬泰恭

武平壘壘水清玉嶷

楊烈將軍梓潼內史巴西譙登

闕

江陽太守江陽侯馥

闕

文立字廣休巴郡臨江人也少遊蜀太學治毛詩三禮
兼通羣書州刺史費禕命為從事入為尚書郎復辟禕
大將軍東曹掾稍遷尚書蜀并于魏梁州建首為別駕
從事咸熙元年舉秀才除郎中晉武帝方欲懷納梁益
引致雋彥泰始二年拜立濟陰太守武帝立太子以司

徒李膺為太傅齊王驃騎為少傅選立為中庶子立上
疏曰伏惟皇太子春秋美茂盛德日新始建幼志誕陟大
繇猶朝日初暉良寶耀璞侍從之臣宜簡俊又妙選賢
彥使視觀則覩禮容棣棣之則聽納當受嘉話駭耳之
言靜應道軌動有所采佐清初陽緝熙天光其任至重
聖王詳擇誠非糞朽能可堪任臣聞之人臣之道量力
受命其所不諧得以誠聞帝報曰古人稱與田蘇遊非
舊德乎立上故蜀大官及盡忠死事者子孫雖仕郡國

或有不才同之齊民為劇又上諸葛亮蔣琬費禕等子孫流徙中畿宜見叙用壹則以慰巴蜀民之心其次傾東吳士人之望事皆施行十年詔曰太子中庶子立忠貞清實有思理器幹前在濟陰政事修明後事東宮盡輔導之節昔光武平隴蜀皆收其才秀所以援濟殊方伸叙幽滯也其以立為散騎常侍累辭不許上疏曰臣子之心願從疏以求昵凡在人情貪從幽以致明斯實物性賢愚所同臣者何人能無此懷誠自審量邊荒遺

燼犬馬老甚非左右機納之器臣雖至愚處之何顏詔
曰常伯之職簡才而授何謙虛也立自內侍獻可替否
多所補納甄致二州人士銓衡平當為士彥所宗故蜀
尚書健為程瓊雅有德望素與立至厚武帝聞其名以
問立立對曰臣至知其人但年垂八十稟性謙退無復
當時之望不以上聞耳瓊聞之曰廣休可謂不黨矣故
吾善夫人也西界獻馬帝問立馬何如對曰乞問太僕
帝每善其恭慎遷衛尉猶兼都職中朝服其賢雅為時

名卿連上表年老乞求解替還桑梓帝不聽咸寧末年
卒帝緣立有懷舊性乃送葬于蜀使者護喪事郡縣修
墳塋當時榮之初安樂思公世子早沒次子宜嗣而思
公立所愛者立亟諫之不納及愛子立驕暴二州人士
皆欲表廢立止之曰彼自暴其一門不及百姓當以先
公故得爾也後安樂公淫亂無道何攀與上庸太守王
崇涪陵太守張寅為書諫責稱當思立言凡立章奏集
為十篇詩賦論頌亦數十篇同郡毛楚揚崇皆有德美

楚牂柯崇武陵太守

柳隱字休然蜀郡成都人也少與同郡杜禎柳伸並知名隱直誠篤亮交友居厚達於從政數從大將軍姜維征伐臨事設計當敵陷陣勇略冠軍為牙門將巴郡太守騎都尉遷漢中黃金圍督景耀六年魏鎮西將軍鍾會伐蜀入漢川圍戍多下惟隱堅壁不動會別將攻之不能克後主既降以手令勅隱乃詣會晉文帝聞而義之咸熙元年内移河東拜議郎武帝踐祚以為西河太

守在官三年以年老去官乞骸還蜀卒於家時年八十
長子充連道令次子初舉秀才杜禎字文然柳仲

字雅厚州牧諸葛亮辟為從事禎符節令梁益二州都
督仲度支禎子瞻字伯重略陽護軍仲漢嘉巴東太守
大同後並舉秀才瞻字彌字景文仲子純字偉淑有名
德幹器舉秀才巴郡宜都建平太守西夷長水校尉巴
東監軍

司馬勝之字興先廣漢綿竹人也學通毛詩治三禮清

尚虛素性澹不榮利初為郡功曹甚善綱紀之體州辟從事進尚書左選郎徙秘書郎時蜀國州書佐望與郡功曹參選而從事倖臺郎時重察舉雖位經朝要還為秀孝亦為郡端右景耀末郡請察孝廉大同後梁州辟別駕從事舉秀才歷廣都新繁令政理尤異以清秀徵為散騎侍郎以宗室禮之終以疾辭去職即家拜漢嘉太守候迎盈門固讓不之官閑居清靜謙卑自牧常言世人不務求道德而汲汲於爵祿若吾者可少以為

有餘榮矣訓化鄉閭以恭敬為先年六十五卒於家子尊賢佐皆有令德

常勗字脩業蜀郡江原人也祖父員牂柯永昌太守父高廟令從父閔漢中廣漢太守勗少與閔子忌齊名安貧樂道志篤墳典治毛詩尚書涉治羣籍多所通覽州命辟從事入為光祿郎中主事入為尚書左選郎郡請迎為功曹時州將董軍政置從事職典刑獄以勗清亮復為督軍治訟平當還察孝廉除郾令為政簡而不煩

魏征西將軍鄧艾伐蜀破諸葛瞻於綿竹威振西土諸
縣長吏或望風降下或委官奔走最獨率吏民固城拒
守後主檄令乃詣艾故郾穀帛全完刺史袁邵嘉最志
節辟為主簿最善儀容翔集動為表觀言論壯烈州里
重之然交友惟賢不交下已者汎愛之恩猶不足邵徵
還道卒 忌字茂通蜀謁者黃門侍郎喪親以致孝聞
察孝廉為郎使吳稱職歷長水參軍什邡雒令大同後
刺史邵坐治城被徵忌詣洛陳訴遠國初附君民始結

不宜改易又表修治城池居安思危邊將常職事皆中
情晉文帝時為相國辟忌舍人武帝踐祚拜騎都尉除
河內令州名為難治忌挫折豪勢風教大行縣有姦嫂
殺兄者羣黨蔽匿前令莫得忌皆窮治入為州都方議
為郡守會卒忌為人信道任數不從下人故為貴勢所
不善是以作詩著論先攻己短臨喪與樂歡哀俱至為
士類所稱忌友人廣漢段宗仲亦有學行蜀時官與忌
比袁邵為主簿與忌共理郡事文帝善之梁州辟別駕

從事舉秀才稍遷官至雲南建寧太守

何隨字季業蜀郡郫人也漢司空武後世有名德徵聘入官隨治韓詩歐陽尚書研精文緯通星歷郡命功曹州辟從事光祿郎中主事除安漢令蜀亡去官時巴土飢荒所在無穀送吏行之輒取道側民芋隨以綿繫其處使足所取直民視芋見綿相語曰聞何安漢清廉行過從者無糧必能爾耳持綿追還之終不受因為語曰安漢吏取糧令為之償察孝廉大同後臺名不詣除河

間王郎中令不就居貧固儉衣弊蔬食晝躬耕耨夕修
講諷鄉族饋及禮厚皆不納目不視色口不語利著譚
言十篇論道德仁讓嘗有屠牽猪過隨門猪索斷失之
強認溷中猪隨便牽猪與之屠人出門尋得其所亡猪
謝隨還猪遂以乞之有家養竹園人盜其筍隨偶行見
之恐盜者覺怖走竹中傷其手足挈屐徐步而歸其仁
如此太康中即家拜江陽太守民思其政年七十一卒
官後州鄉人言議平當者皆相謂何江陽至于汶山夷

有正直廉讓者亦號夷中何江陽杜景文何興仁皆為
作傳 長子觀字巨忠清公淑慎知名州里察孝廉西
都南安令平西長史張昌作亂荊州從黨西上郡守無
不望風降下至江陽平西將軍羅尚表為安遠護軍討賊
平殄除巴郡太守朝議欲以為寧州刺史會病卒次子
遊治中從事隨時同郡繁令張崇清廉推讓見稱當時
王化字伯遠廣漢人也漢將作大匠王堂後也祖父
商字文表州牧劉璋時為蜀太守有懿德高名在耆舊

傳父彭字仲巴郡太守化兄弟四人少有令望化治毛
詩三禮春秋公羊傳郡命功曹州辟從事光祿郎中主
事尚書郎除閬中令為政清靜察孝廉大同後復端右
郡察孝廉為樂涪令縣近邊塞值外虜反化率吏民積
穀堅守虜斷道重圍孤絕七年伺虜怠惰出軍討之民
得野掠大軍至虜退以功封關內侯遷朱提太守撫和
殊俗得夷晉懽心轉在梓潼復有稱績為人嚴重言論
方雅臧否允衷州里服其誠亮年七十二卒官弟振字

仲遠亦有德望廣都令巴東太守叔弟岱字季遠恪居
官次歷廣陽作唐令早亡少弟崇字幼遠學淵博雅性
洪粹蜀時東觀郎大同後梁州辟別駕別舉秀才尚書
郎與壽良李宓陳壽李驤杜烈同入京洛為二州標雋
五子情好未必能終惟崇獨以寬和無所彼此著蜀書
及詩賦之屬數十篇其書與陳壽頗不同官至上庸蜀
郡太守

陳壽字承祚巴西安漢人也少受學於散騎常侍譙周

治尚書三傳銳精史漢聰警敏識屬文富豔初應州命
衛將軍主簿東觀秘書郎散騎黃門侍郎大同後察孝
廉為本郡中正益部自建武後蜀郡鄭伯邑大尉趙彥
信及漢中陳申伯祝元靈廣漢王文表皆以博學洽聞
作巴蜀耆舊傳壽以為不足經遠乃并巴漢撰為益部
耆舊傳十篇散騎常侍文立表呈其傳武帝善之再為
著作郎吳平後壽乃鳩合三國史著魏吳蜀三書六十
五篇號三國志又著古國志五十篇品藻典雅中書監

荀勗令張華深愛之以班固史遷不足方也出為平陽侯相華又表令次定諸葛亮故事集為二十四篇時壽良亦集故頗不同復入為著作鎮南將軍杜預表為散騎侍郎詔曰昨適用蜀人壽良具員且可以為侍御史上官司論七篇依據典故議所因革又上釋諱廣國論華表令兼中書郎而壽魏志有失勗意勗不欲其處內表為長廣太守繼母遺令不附葬以是見譏數歲除太子中庶子太子傅從後再兼散騎常侍惠帝謂司空張

華曰壽才宜真不足久兼也華表欲登九卿會受誅忠
賢排擯壽遂卒洛下位望不充其才當時寃之 兄子

符字長住亦有文才繼壽著作佐郎上廉令符弟莅字
叔度梁州別駕驃騎將軍齊王辟掾卒洛下 莅從弟

階字達芝州主簿察孝廉褒中令永昌西部都尉建寧

興古太守皆辭章燦麗馳名當世凡壽所述作二百餘

篇符莅階各數十篇二州先達及華夏文士多為作傳

大較如此

時梓潼李驤叔龍亦雋逸器知名當世舉秀才尚書郎拜建平太守以疾辭不就意在州

里除廣漢太守初與壽齊望又相昵友後與壽情好搆隙還相誣攻有識以是短之亦自別傳

李宓字令伯犍為武陽人也祖父光朱提太守父早亡母何更行見養祖母治春秋左傳博覽五經多所通涉機警辯捷辭義響起事祖母以孝聞其侍疾則泣涕側息日夜不解帶饌飲湯藥必過目嘗口本郡禮命不應州辟從事尚書郎大將軍主簿太子洗馬奉使聘吳吳主問蜀馬多少對曰官用有餘民間自足矣吳主與羣臣汎論道義謂寧為人第宓曰願為人兄吳主及羣臣稱

之大同後征西將軍鄧艾聞其名請為主簿及書招欲
與相見皆不往以祖母年老心在色養拒州郡之命獨
講學立旌授生武帝立太子徵為洗馬詔書累下郡縣
相逼宓上疏

疏在本傳

武帝覽之曰宓不空有名也嘉其誠

款賜奴婢二人下郡縣供其祖母奉饌徙尚書郎河內
溫令敷德陳教政化嚴明太傅鉅平侯羊公薨無子帝
令宗子為世子嗣之不時赴喪宓遣戶曹齋移推轂遣
之中山諸王每過溫縣必責求供給吏民患之宓至中

山王過縣徵芻茭薪蒸必引高祖過沛賓老幼桑梓之
供一無煩費伏惟明王孝思惟則動識先戒本國望風
式歌且舞誅求煩碎所未聞命後諸王過不敢煩溫縣
盜賊發河內餘縣不敢近溫追賊者不敢經界隴西王
司馬子舒深敬友之而貴家憚其公直寔去官為州大中
正性方亮不曲意勢位者失荀張指左遷漢中太守諸
王多以為寃一年去官年六十四卒著述理論論中和
仁義儒學道化之事凡十篇安東將軍胡罷與皇甫士

安深善之又與士安論夷齊及司馬文中杜起宗却令
先文廣休等議論往返言經訓詰衆人服其理趣釋河
內趙子聲譏詩賦之屬二十餘篇壽良李驤與陳承祚
相長短宓公議其得失而切責之常言吾獨立於世顧
景為疇而不懼者心無彼此於人也故宓六子皆英挺
秀逸號曰六龍 長子賜字宗碩州別駕舉秀才汶山
太守少與東海王司馬元超友昵每書詩往返雅有新
聲少子興字雋雄太傅參軍幼子盛碩寧浦太守 宓

同時蜀郡高玩字伯珍少受學於太常杜瓊術藝微妙
博聞強識清尚簡素少與宓齊名官位相比大同後察
孝廉除曲陽令單車之縣移檄縣綱紀不使遣迎以明
三材徵為太史令送者亦不出界朝廷稱之方論大用
會卒

杜軫字超宗蜀郡成都人也父雄字伯休安漢雒令軫
少師譙周發明高經於譙氏之門郡命為功曹鄧艾既
破蜀被徵鍾會進成都時太守南陽張府君不肯出官

軫進曰征西囚執鎮西在近必有所遣軍亂之際交害
無常宜避正殿府君即出住下舍會果遣參軍牽弘為
太守數百騎擐甲馳馬入郡前駢問侯所在云已出善
之弘復召為功曹察孝廉除建寧令徙仕山陽新城池
陽所在有治入為尚書郎每升降趨翔廊閣之下威容
可觀中朝偉之遷健為太守惠愛在民還為州大中正
軫既才學兼該而器量倜儻武帝雅識之方用內侍會
卒時年五十八 弟烈字仲武貞幹敏識平坦和粹名

譽侔軫察考廉歷平康牛鞞南鄭安陽令王國建首選
為郎中令選衡陽太守兄軫喪自上求去官以兄子幼
弱軫喪飄飄欲扶將靈柩葬舊墳武帝歎惜軫能用未
盡而嘉烈弟意轉拜徙官犍為太守又轉湘東少弟

良字幼倫亦有當世局分舉秀才茶陵新都令國王郎
中令遷涪陵建寧太守兄弟並興州里以為美譚軫

二子長子毗字長基少子秀字彥穎珪璋琬琰世號二
鳳毗舉秀才大將軍辟掾太傅參軍平東長史尚書郎

稍遷鎮南軍司益州刺史主簿早卒

任熙字伯遠蜀郡成都人也漢大司農任方後也世有
德彥父元字秀明健為太守執金吾熙治毛詩京易博
通五經事親至孝居喪毀瘠為州鄉所稱察孝廉除南
鄭令以病去官復授南鄭不就轉梓潼令為政清淨辭
疾告歸勤農力穡居室致給循訓闔門內則可法博愛
以謙恭接物開門待賓傾懷下士客無長幼必有供饌
清談遊講不妄失言祇慎著聞太康中除越雋護軍非

其雅好不往徵給事中熙以侍臣日左右贊暉揚光
不可苟私終以疾辭而蜀郡令每至官為之脩謁歲致
羊酒即家拜朱提太守固讓不之官好述作詩誄論難
皆燦豔年六十九卒於家子蕃字憲祖察孝廉新都令
西夷司馬涪陵太守蕃子迪字叔孤少與巴西龔壯俱
知名而學業優之早歿熙同時健為揚彭敬宗第達訓
宗各以德行稱同察孝廉彭比蘇令甘露降其縣達滇
池令殊俗懷其德

王長文字德雋廣漢人也父顓字伯元健為太守長
文天姿聰警高暢敏識治五經博綜羣籍弱冠州三辟
書佐丁時衰託疾歸家大同後郡功曹察孝廉不就
遂陽愚嘗著絳衣絳帽牽猪過市中乞人與語偽不聞
常騎牛周旋郡守初至詣門脩敬至間走出請終不還刺
史淮南胡羆辟從事祭酒卧在治羆出板舉秀才長文
陽發狂疾步擔走出門羆累遣教請還終不顧還家養
母獨講學著無名子十二篇依則論語又著通經四篇

亦有卦名擬易玄以為春秋三傳傳經不同每生訟議
乃據經摭傳著春秋三傳十三篇又撰約禮記除煩舉
要凡十篇皆行於時長文才鑒清妙汎愛廣納放蕩濶
達不以細宜廉分為意亦不好臧否人物故時人愛而
敬之以母欲祿養咸寧中領蜀郡太守郫有孝子羅偶
事親至孝二親將亡時病不能食肉終身不食肉郡察
孝廉長文追為立表以旌之宰府辟三司及撫軍大將
軍王濬累辟不詣濬薨以故州將軍弔祭元康初試守

江原令縣收得盜賊長文引見誘慰時適臘晦皆遣歸家獄先有繫囚亦遣之謂曰教化不厚使汝等如此長吏之過也蜡節慶析歸就汝上下善相懽樂過節來還當為思他理羣吏惶遽爭請不許尋有赦令無不感恩所宥人輟不為惡曰不敢負王君將喪去官民思其政大將軍梁王彤及諸府並辟長文曰吾從其先命者遂應彤招為從事中書郎諸王公卿慕其名咸與之交賈氏之誅從彤有功封關內侯再為中書郎愍懷太子死

於許下博士中書論虞祔之禮長文議虞祭宜還東宮以繼太子者為主配食於潁川府君皆施行除洛陽令長文見彤曰主者不庶幾奏長文為洛陽令彤笑答曰卿乃不庶幾非主者也固辭不拜長文聞益州亂以通經筮得老蠶緣枯桑之卦歎曰桑無葉蠶以卒也吾蜀人殄於是矣拜蜀郡太守暴疾卒時年六十四長文同時蜀郡柳竺任興亦博學著聞俱為州別駕竺在右職公亮蹇蹇刺史盛怒欲殺人羣下請不聽竺乃懷縛徑

入頓几上乃極陳其刑理刺史從謝還縛

關

皆早亡

下作長久

壽良字文淑蜀郡成都人也父祖二世健為太守良少與健為張徵費緝並知名治春秋三傳貫通五經澡身貞素州從事散騎黃門侍郎大同郡主簿上計吏察孝廉不就州辟主簿治中別駕舉才行刺史皇甫晏貢之三司遂辟太宰除霸城令始平太守治政著稱從扶風轉秦國內史文立卒後溫令李宓表武帝言二州人士

零顏才彥凌遲無復厠豫綱紀後進慰寧遐外者良公
朝英特二州之望宜見超予紹繼立後帝徵為黃門侍
郎兼二州都給事中梁州刺史遷散騎常侍大長秋卒
葬洛北芒山 徵字建興張翼子也篤志好學官至廣
漢太守 緝字文平清檢有治幹舉秀才歷城令涪陵
太守遷譙內史 良公朝疑誤

何攀字惠興蜀郡郫人漢司空汎鄉侯武弟潁川太守
顯後也父包字休揚察舉秀孝皆不行除瑯琊王中

尉不就攀兄弟五人皆知名攀少夙成奇姿卓逸弱冠
郡主簿上計吏州辟從事刺史皇甫晏稱攀王佐才也
以為主簿泰始十年養母歸家晏為牙門張弘等所害
攀操表徑詣洛訟釋事得清刺史王濬復辟主簿別駕咸
寧三年濬被詔罷屯田兵作船為伐吳計攀進曰今見
佃兵但六百人計作船六七年財可勝萬人後者未成
前者已腐無以輔成國意宜輒召四守休兵及諸武吏
并萬餘人造作歲終可辦濬及綱紀疑輒召萬兵欲先

上須報攀曰官家雖欲伐吳疑者尚多卒聞召萬兵必
不見聽以佃兵作船船不時成當輒召以速為機設當
見却功夫已成勢不得止濬善之議欲入山裁船動數
百里艱難攀曰今冢墓多種松柏當什四市取以速為
機濬悅之任攀典舟船器仗冬遣攀使洛攀曰聖人之
功可成使人信之不可必也夫高祖之大略猶未察於
韓信婁敬因蕭何子房而後用之今建非常之功或莫
之信羊公使君同盟國家所重加曩日失策江陵思有

夙駕宜與相聞此一助也濟曰何但羊叔子亦宋元亮
之憂君至洛官家未有舉意便前襄陽與羊宋論之攀
既至洛拜表獻策因至荊州與刺史宋庭論宋未許乃
見羊祜累日共畫用兵之要攀曰若令循清海以趣京
口壽春揚州直指秣陵兗豫踰海並據桑浦則武昌以
東會稽以西騷然駭矣荊州平南徑造夏口巴東諸軍
固守西陵益梁之衆乘浮江東下封樂鄉要巴丘則武
陵零桂長沙湘東從風而靡矣但明信賞首尾俱會旌

旗耀天四面雲合乘勝席卷傳檄南極吳會不盡平者
未之有也羊祜大悅遂表請伐吳尋徵濬大司農至晉
壽詔以濬為龍驤將軍除攀郎中參濬軍事攀頻奉使
詣洛時未婚司空裴公奇其才以女妻之五年秋攀使
在洛安東將軍王渾表孫皓欲北上邊戍警戒朝議征
却須六年攀上疏策皓必不敢出宜因今戒嚴掩取甚
易中書令張華命宿下舍設諸難攀皆通之又濬性在
忠烈受命必果宜重其位號詔書遷濬平東將軍督二

州事吳平封關內侯濟入拜輔國攀為司馬上論時務
五篇除滎陽令進廷尉評有盜開城門下關者法據大
辟攀駁之曰上關執信之主下關儲備之物設有開上
關何以加刑遂減死多所議讞遷散騎侍郎太傅楊駿
謀逆請衆官攀與侍中傅祗侍郎王愷等往惠帝從楚
王瑋殿中中郎孟觀策戒嚴誅駿駿外已忿忿攀與祗
踰墻得出侍天子天子以為翊軍校尉領熊渠兵一戰
斬駿社稷用安封西城公邑萬戶策曰於戲在昔先王

光濟厥世罔不開國列土建德表功也故逆臣楊駿謀
危社稷構兵飛矢集于殿庭白刃交於宮闈攀受命奮
討凶逆速殄忠烈果毅朕甚嘉焉今以魏興之西城為
攀封國錫茲玄社苴以白茅永為晉藩輔往欽哉敬乃
有土惠康黎元無或以隳爾顯烈又賞絹萬疋攀固辭
受五千疋又賜拜第逢平鄉侯兄子夔關內侯遷宣城
內史不就轉東羌校尉西虜寇邊遣長史楊威討之違
攀指受失利徵還領越騎校尉會武庫災百官皆赴火

攀獨以兵衛宮復賞絹五百疋領河南尹遷揚州刺史
假節在官數年德教敷宣征虜將軍石崇表東南有兵
氣不宜用遠人徵拜大司農兼三州都自表以被疾錯
忘不堪銓量人物讓都職於任熙費緝不聽轉遷兗州
刺史錫寶劍赤烏固辭不之官時帝室政衰多害忠直
又諸王迭起好結黨徒攀闔門治疾不與世務朝議欲
以為公會薨時年五十七天子愍悼追贈司農印綬謚
曰桓公遺令勅世子務行恭儉引荀公曾諸葛德林為

模範子璋嗣

李毅字允剛廣漢鄴人也祖父朝字偉南州別駕從事父旦字欽宗光祿郎中主事毅少散達不治素檢年二十餘乃詣郡文學受業通詩禮訓詁為學主事太守弘農王濬臨學講試問祭酒姬艷曰學中有可成進幾百人艷對曰可有百人濬怒曰童冠八百而成者百人教少何為毅對曰如艷之言明府之教盛於孔氏不為少也濬奇之命為主簿濬嘗夢得三口刀云人以禾益之

手持不得以問郡丞與掾吏莫能知毅對曰吉祥也三
刀者州字而益之禾持不得禾傍失者秩字明府秩當
至益州濬笑曰如卿言當相以為秀才張弘殺益州刺
史皇甫晏誣表晏反毅白濬曰皇甫侯起自諸生位極
方州又當何求且廣漢與成都密邇而統梁州者益
州之領須防若今日也益州有禍乃此郡之憂加張弘
小豎衆所不與宜時赴討濬欲先上後行毅曰大夫出
疆苟利社稷專之為賢何況殺主賊急當不拘常宜濬

從之發兵與牙門滿泰等共討弘斬之詔書遷濬益州
刺史毅復為州主簿別駕舉秀才及濬伐吳與何攀並
為參軍吳平封關內侯除隴西護軍以疾去官徙繁令
遷雲南太守濬臨薨上表後武帝思濬勲問毅所在徙
犍為使持節南夷校尉久之犍為民毛詵李叡與朱提
民李孟共逐太守杜俊雍約以叛衆數萬毅討破之斬
詵孟首叡走依五茶夷亦叛晉朝復置寧州以毅為刺
史加龍驤將軍封成都縣侯夷遂大反破沒郡縣攻圍

州城中原亂而李雄寇蜀救援不至疾病薨於窮城懷
帝嘉其忠節追贈少府諡曰威侯毅性通博居情雅厚
賑卹寒貧篤於故舊人咸愛歸之但好詼諧德重猶少
從弟苾字叔平少修身砥厲名行數諫毅宜自矜嚴毅
笑應之曰吾小來不治名素終杖旄節故可至九卿卿
清儉履道卒不失成都令也時毅始受南夷而苾歷城
令果作成都遷犍為太守官位不及毅毅子釗世秉儒
學有格望以父任為謁者除壽林侯相不就為尚書外

兵郎自表赴難至牂柯夷斷道不得進經年以寧州城中無穀父疾病未知吉凶不食穀惟茹草迄至奔喪官至朱提越雋太守西夷校尉毅女秀適漢嘉太守新都王載有才智父亡後州文武推領州三年二州當太清中位至方州節將者壽良何攀及毅永嘉中巴張奕希祖為荊州刺史南蠻長水校尉蜀郡張峻紹茂為監南中八部事西夷校尉持節事

楊邠字歧之捷為武陽人也少好學志古藻厲名行州

辟主簿別駕刺史王濬舉秀才安漢雒令國中尉以
選為尚書郎遷汶山太守值夷復讎失殊俗和徙授巴
東轉廣漢永嘉初進衡陽內史遇流民叛亂攻沒長沙
湘東邵輒救助賊衆浸盛遂破郡城獲邵欲以為主邵
不許賊晝夜執守邵候其小怠夜急走比覺已去遠收餘衆
軍重安欲投湘州刺史荀眺共圖進取會眺降賊邵孤軍固
城賊攻圍之誓死不移遂卒城中時年六十九帝為鎮東大
將軍嘉其忠節死義遣使弔贈策曰惟永嘉七年四月己未

使持節都督江陽諸軍事鎮東大將軍瑯琊王睿謹遣
板命前衡陽內史楊君忠肅貞固守正不移雖危逼節
義可嘉不幸殞卒孤城甚悼之今列上尚書贈君淮南

內史魂而有靈嘉茲寵榮嗚呼哀哉

邠同郡楊稷文曹
泰始初為交趾太

守平九真鬱林日南四郡斬吳交州刺史劉峻大將軍
修則武帝方授交州會孫皓遣大將薛珣陶璜十萬人
攻稷被攻八月救援不至眾寡不敵遂為珣璜所獲因
稷欲以送皓稷歐血死帝嘉其忠烈歿命追贈交州刺
史也

費立字建熙犍為南安人也父揖字君讓巴西太守立

學義冲邃玄靜沉嘿察孝廉王國中尉王年少好輕行
遊觀立常正色匡諫及上疏風喻辭義劇切合箴規之
體出為成都令縣名難治立蒞之垂績以性公亮入為
州大中正除巴西太守不就轉梁益寧三州都督兼尚
書值大駕西幸長安常與大臣居守在洛加負外散騎
常侍封關內侯每準正三州人物品格褒貶臆意方規
無復疏親莫不畏敬然委曲者多恨其繩墨數辭諸郡
意在河秦汝潁久之朝議欲以為荊州永嘉六年與子

并沒于胡寇立時漢國呂毅叔偉德以清彥辟別舉秀

才尚書郎秦國內史

長水校尉員外常侍梁州都督與立同沒胡寇

常騫字季慎蜀郡江原人也祖父竺字代文南廣太守

侍中父偉字公然閬中令騫治毛詩三禮以清尚知名

州辟部從事主簿郡請功曹察孝廉萍鄉令以選為國

王侍郎出為綿竹令國王歸之復入為郎中令從王起

義有功封關內侯遷魏郡太守加材官將軍以晉政衰

覩中原不靜固辭去官拜新都內史時蜀亂民皆流在

荆湘徙相東太守疾病未拜卒年六十八騫性泛愛敦
敬友宗族當官修理恕以撫物好咨問動必謙讓州鄉
以為儀範二州清官見述者先有宜都太守犍為唐定
義業隴西太守巴西馮企休翊而後騫云

常寬字泰恭騫族弟郾令勗弟子也父廓字敬業以明
經著稱早亡闔門廣學治毛詩三禮春秋尚書尤耽意
大易博涉史漢彊識多聞而謙虛清素與俗殊務郡命
功曹及察孝廉不就州辟主簿別駕舉刺史羅尚秀才

為侍御史除繁令隨民安縣零陵以舉將喪去官湘州
叛亂乃南入交州交州刺史陶咸表為長史固辭不之
職雖流離交城衣弊襦袍冠皮冠乘牛往來獨鳩合經
籍研精著述依孟楊宗盧師矩著典言五篇撰蜀後志
及後賢傳續陳壽耆舊作梁益篇元帝踐祚嘉其德行
潔白拜武平太守民悅其政以榮貴非志在官三年
去職尋梁碩作亂得免難卒於交州凡所著述詩賦論
議二十餘篇子長生字彭祖亦有學行州主簿資中令

治中從軍早亡時蜀郡太守巴西黃容亦好述作著家訓梁州巴紀姓族左傳抄凡數十篇漢嘉太守蜀郡杜龔敬脩亦著蜀後志及志趙廐李特叛亂之事及喪紀禮式後生有取焉

譙登字慎明巴西充國人譙周孫也仲父熙察孝廉本郡大中正沔陽令叔父同字彥紹少知名拒州郡之命梁州刺史壽良與東羌校尉何攀貢之三司及大將軍幕府為尚書郎除錫令亦有為作傳者登少以公



亮義烈聞郡命功曹州辟主簿別駕從事領陰平太守
郡五官素大姓豪擅侵凌羌晉登誅之郡中皆肅後以
李特作亂本郡沒寇父為李雄巴西太守馬脫所殺乃
東詣鎮南劉公請兵時中原亂守公三年不能得兵表
拜揚烈將軍梓潼內史使合義募登凡募巴蜀流士得
二千人鎮西將軍羅尚以退住巴郡登從尚索益軍討
雄不得乃往攻宕渠斬脫食其肝巴西賊破復詣尚求
軍尚參伍多以必無利登憤恚數凌折之又加責於尚

尚但下之而已會羅叢殺雄太尉李離舉梓潼來降登
徑進涪城雄自攻登為登所破而尚將張羅進屯犍為
之合水文碩殺雄太宰李國以巴西降羅遣軍掠廣漢
破雄叔父驤虜其妻子募人所雄頭賊以向困而尚本
參伍恨登之見矜侮不供其軍食益州刺史皮素至巴
東勅平西送故遣將張順楊顯救登至墊江素遇害順
顯還雄知登乏食遣驤致攻兵窮士餓誓死不退衆亦
餓死而無去者永嘉三年為驤所生得與登致雄言辭

慷慨涕泣歔歔無服降臣折情雄乃殺之囚其軍士皆
以為奴虜畀兵士而連陰雨百餘日雄中以登為枉而
所領無辜怒氣感天下赦出登軍士湮沒者 初尚之
在成都也與雄攻戰郾令犍為張昕欽明每摧破雄衆
雄憚之而救助不能并心為雄所殺雄常言羅尚將均
如張昕輩吾族早無遺矣 時牙門左汜亦有戰功尚
不能益其兵穀汜恚恨以母喪歸尚累召不往尚怒曰
微左汜當不滅賊乎遂殺之雄聞汜死大小相賀 登

同郡縣李高亦有武幹平吳時與牙門將處前獲孫皓封縣侯官至金城鴈門太守

侯馥字世明江陽人也察孝廉平西參軍

闕

薨後巴郡亂避地入牂柯寧州刺史王遜領平

西將軍復取為參軍遜議欲遷牂柯太守謝恕為涪陵太守出屯巴郡之把口表馥為江陽太守往江陽之沘源撫卹蠻獠克復江陵請通長江雄征東大將軍李恭已在江陽馥招降夷獠脩繕舟艦為進取計預白遜請

軍移恕俱出涪陵不能自前恭舉衆攻馥衆寡不敵為恭所破獲生虜馥送雄雄下廷尉責曰事君有死無二其次破家與國今縱不死又無益國灰沒其分守心而已無他顧望雄必欲屈之使馥同郡人張迎曉喻之馥怒罵迎曰吾等國亡不能存大難不能死低眉海內何面目相見也且王寧州治亂才也以吾有桑梓之恥故遠上尚書遣吾討賊受命之日實忘寢食但裁船未辦請軍未至牽揣不及為他所先當滅身隕碎以謝不及

冀上不負日月下不愧王侯吾豈苟生如卿兒女之人
乎迎還白雄雄義而赦之時雄衆寇所獲犍為太守建
寧魏紀漢國太守梓潼文琰巴郡太守巴西黃龕涪陵
太守巴西趙弼永昌謝俊牂柯文猛皆區區稽顙無如
馥者數年卒

謨曰文王多士才不同用孔門七十科行相揆百行殊塗貴
於一致若斯諸子或挺珪璋之質或苞瑚璉之器或耽
儒墨之業或韜王佐之畧潛則泥蟠躍則龍飛揮翮揚

芳流光遐紀實西土之珍彥聖晉之多士也徒以生處
限外服膺日淺負荷榮顯未充其能假使植幹華宇振
條神區德行自有長短然三趙兩李張何之軌其有及
之者乎譙登侯馥忠規奮烈美志不遂哀哉

五公

司空何武 司空趙戒 太尉趙謙 司徒趙溫
司空張皓

華陽國志卷十一

欽定四庫全書

華陽國志卷十二

晉常璩撰

序志

巴蜀厥初開國載在書籍或因文緯或見史記久遠隱
沒實多疎略及周之世侯伯擅威雖與牧野之師希同
盟要之會而秦資其富用兼天下漢祖階之奄有四海
梁益及晉分益為寧司馬相如嚴君平揚子雲陽成子

玄鄭伯邑尹彭城譙常侍任給事等各集傳記以作本紀畧舉其隅其次聖稱賢仁人志士言為世範行為表則者名挂史錄而陳君承祚別為耆舊傳始漢及魏煥乎可觀然三州土地不復悉載地理志頗言山水歷代轉久郡縣分建地名改易於以居然辨物知方猶未詳備於時漢晉方隆官司星列提封圖簿歲集司空故人君學士蔭高堂翳帷幙足綜物土不必待本紀矣曩遭阨運函夏滔堙李氏攄蜀兵連戰結三州傾墜生民殲盡

府庭化為狐狸之窟城郭蔚為熊羆之宿舍遊雉鹿田
棲虎豹平原鮮麥黍之苗千里茂鷄狗之響丘城蕪邑
莫有名者嗟乎三州近為荒裔桑梓之域曠為長野反
側惟之心若焚灼懼益遐棄城陴靡聞迺考諸舊紀先
宿所傳并南裔志驗以漢書取其近是及自所聞以著
斯篇又畧言公孫述蜀書咸熙以來喪亂之事約取耆
舊士女英彥又肇自開闢終乎永和三年凡十篇號曰
華陽國記夫書契有五善達道義章法戒通古今表功

勲而後旌賢能恨璩才短少無遠及不早援翰執素廣
訪博咨流離困瘵方資腐帛於顛墻之下求餘光於灰
塵之中刪滅者多故有所闕猶愈於遺忘焉

蜀紀言三皇乘祗車出谷口秦宓曰今之斜谷也及武王伐
紂蜀亦從行史記周貞王之十六年秦厲公城南鄭此谷道
之通久矣而說者以為蜀王因石牛始通不然也本紀
既以炳明而世俗間橫有為蜀傳者言蜀王蠶叢之間
周迴三千歲又云荊人鼈靈死屍化西上後為蜀帝周

萇弘之血變成碧珠杜宇之魄化為子鵲又言蜀椎髻
左衽未知書文翁始知書學案蜀紀帝居房心決事參
伐參伐則蜀分野言蜀在帝議政之方帝不議政則王
氣流於西故周失紀綱而蜀先王七國皆王蜀又稱帝
此則蠶叢自王杜宇自帝皆周之叔世安得三千歲且
太素資始有生必死死終物也自古以來未聞死者能
更生當世或遇有之則為怪異子所不言況能為帝王
乎碧珠出不一處地之相距動數千里一人之血豈能

致此子鵠鳥今云是雋或曰雋周

今案說文云蜀王望帝姪其相妻慙亡去

為子雋鳥故蜀人聞子雋鳴皆起云望帝雋戶圭切所言與蜀志所述相似爾雅亦云雋周子雋鳥也出蜀中

四海有之何必在蜀昔唐帝萬國時雍虞舜光宅八表

大禹功濟九州后稷封殖天下井田之制庠序之教由

來遠矣孔子曰述而不作信而好古竊比於我老彭則

彭祖本生蜀為殷太史夫人為國史作為聖則傳自上

世見稱在昔及周之末服事於秦首為郡縣雖濱戎夷

亦有冠冕故蜀紀曰大人之鄉方大人之國也至於漢

興反當荒服而無書學乎漢書曰郡國之有文學因文
翁始若然翁以前齊魯當無文學哉漢末時漢中祝元
靈性滑稽用州牧劉焉談調之末與蜀士燕骨聊著翰
墨當時以為極歡後人有以為惑恐此之類必起於元
靈之由也惟智者辨其不然幸也綜其理數或以為西土
嶮固矜帶易守世亂先違道治後服若吳楚然故逋逃
必萃奸雄闕覲蓋帝王者統天理物必居土中德膺
命運非可資能恃險以干常亂紀雖號食竊名號終於絕

宗殄祀何者天命不可以詐詭而邀神器不可以僥倖而取也是以四岳三塗陽城太室九州之險而不一姓冀之北土馬之所產古無興國夫恃險憑危不階厯數而能傳國垂世所未有也故公孫劉氏以敗於前而諸李踵之覆亡於後天人之際存亡之術可以為永鑒也干運犯厯破家喪國可以為京觀也今齊之國志貫之一揆同見不臣所以防狂狡杜奸萌以崇春秋敗絕之道也而顯賢能著治亂亦以為獎勸也其序曰

先王經畧萬國剖分厥甸巴梁式象縣辰九俊述職賦
政以均佐周斃紂相漢亡秦寔繁其民世載其俊

述巴志第一

維天有漢鑒亦有光實司羣望表我華陽炎劉是應洪
祚攸長

述漢中志第二

井絡啓耀文昌契符茫茫禹績畫為九州功冒普天率
土以休光靈遐照慶祚爽流邦家濟濟世德球球

述蜀志第三

蠢爾南域在彼要荒漢武德振蠻貊是攘開州列郡幽
裔來王系遠能邇實須才良甄德表失以明紀綱

述南中志第四

赤德中微巨猾干篡白虜乘興致民塗炭爰迄靈獻皇
極不建牧后失圖英雄迭進覆車齊軌蒙此艱難

述公孫劉二牧志第五

政去王室權流二桀瓜分天壤宰割民物舍彼信順任

此智計大道既隱詭詐競設並以豪特力爭當世居正
慮明名號絕替身兼萬乘籍同列國

述劉先主志第六

乾坤渾始樹君立王天工人代萬邦是望明不二日地
不二皇苟非其器窮高必亢濛濛後主弗慮弗臧負乘
致寇世業以喪

述劉後主志第七

陽升三九品物始亨帝紘失振任非其良趙倡禍階亂

是用長羅州播蕩朱旌莫亢皮張不造戎醜攸行哀哀
元黎顧瞻靡望

述大同志第八

素精南飄天維弛綱薨薨特流肆其豺狼蕩雄纂承殲
我益梁牧守顛摧黔首辛嘗三州毀曠攸然以荒絡結
王罔民亦流亡

述李特雄期壽勢志第九

華嶽降精江漢吐靈濟濟多士命世克生德為世雋幹

為時貞畧舉士女表諸賢明世濟其美不隕其名

述先賢士女總讚論第十

皇皇大晉下土是覆化澹教洽誕茲彥茂我我俊又疊
疊英秀如嶽之崇如蘭之臭經德秉哲綽然有裕

述後賢志第十一

博考行故摠厥舊聞班序州部區別山川憲章成敗旌
照仁賢抑絀虛妄糾正繆言顯善懲惡以杜未然

述序志第十二

謨曰駟牡駢駢萬馬龍飛陶然斯猶阜會京畿磨獲西
狩鹿從東廩邨伯勞之旬不接辰嘗茲珍嘉甘心庶幾
中為令德一行可師瓚璋俶儻貴韜光暉據冲體正平
揖宣尼導以禮樂教洽化齊木訥剛毅有威有懷鏘鏘
宮縣磬筦諧諧金奏石拊降福孔皆揔括道檢揔覽幽
微選賢與能仁遠乎哉

益梁寧三州先漢以來士女目錄

晉常璩撰

高尚逸民嚴遵字君平

成都人也

高尚逸民林閭字公孺

臨邛人揚雄師之見方言

德行治中從事李弘字仲元

成都人也

德行給事黃門侍郎揚雄字子雲

成都人也

文學神童楊烏

雄子也七歲預父立文九歲卒

文學侍中揚州刺史張寬字叔文

成都人始受文翁遺東受七經還以教授

者

文學中郎將司馬相如字長卿

成都人也

文學諫議大夫王褒字子淵

資中人也

尚書郎楊壯

成都人也見揚子方言

美秀中郎將何霸字翁君

郫人也

執政大中司空汎鄉侯何武字君公

霸弟以忠正為三公王莽篡位

憚而殺之

潁川太守何顯

武弟也兄弟五人皆在漢書武子況嗣武侯王莽時廢

黃門侍郎鄧通

蜀人孝文帝時為侍郎甚有寵

卓王孫

臨邛人也見食貨志姑仍舊列於執政目下

政事左衛護軍陳立字少遷

臨邛人歷牂柯巴郡天水三郡太守治為天下最

節士太中大夫章明字公孺

繁人也

節士尚書郎侯岡字宣孟

新繁人也

節士尚書郎王嘉字公卿

江原人也

節士美陽令王皓字子離

江原人也

右十九人在前漢

其侍郎田儀楊德意無善事在中也

知士博士羅衍字伯紀

成都人也

德政益州太守王阜字世公

成都人也

長沙太守任循字伯度

成都人少失父後為長沙父流離遠屆長沙為郡五官父之母

識知是事在精通也

公亮大司農司隸校尉任昉字文始

循子也

徐州刺史任愷字文悌

昉弟也

文學侍中五更張霸字伯饒謚曰文父

成都人也

校書郎楊終字子山

成都人也

聘士張楷字公超

文父子也

聘士張光超

公超弟也

尚書張陵字處沖

公超子自陵之後世有大官

義士趙定

成都人以延仁赴義濟窮恤乏為業

保貴太尉司徒司空特進廚亭文侯趙戒字志伯

子定

文學國師太常趙典字仲經

戒第二子也

忠亮太尉司徒郢惠侯趙謙字彥信

戒孫也其子孫襲廚亭侯不顯

道德司徒司空趙溫字子柔

謙弟自是後世有二十石

義烈侍中長水校尉常洽字茂尼

江原人見趙溫傳

道德侍御史常詡字孟元

江原人在趙太尉公著舊傳

述作謁者僕射何英字叔俊

郾人也作漢德春秋

經治捷為屬國何汶字景由

英孫也

高士楊由字哀侯

成都人也見後漢方術傳

篤愛高士侯祈字升伯

繁人文父楊序弟子

篤愛博士楊珏字仲桓

成都人何長弟子

公府辟士羅衡字仲伯

郾人亦長弟子也

至孝孝廉禽堅字孟由

成都人

推賢美陽令柳宗字伯騫

成都人也

求次方

王仲曾

張叔遼

殷知孫

並蜀人伯騫所拔皆致郡守失其官名

匡正治中從事張充字伯春

江原人

匡正司空辟士李幾字孟元

江原人也

猛畧部從事楊疎字子恭

成都人也子統為二千石失其官

守憲陳湛字小伯

成都人

節士仲昱

成都人也

高士王廣

皓子也父為公孫述所聘自刎廣逃匿述破後郡及州命察舉皆不往曰吾不能復辯敢

當世榮利也

仁義志士任末字叔本

繁人也

烈士嚴道主簿李磬字文寺

嚴道人也

義烈郡功曹史朱普字伯禽

廣都人也

巴郡太守朱辰字元燕

廣都人也

述作漢中太守鄭厘字伯邑

臨邛人也作者舊傳

右四十人馳名後漢

尚書郎張俊失其行事不載學士張寧見朱倉傳朱倉字

雲卿見下目什邡人傳未詳

大鴻臚何宗字彥英

郫人也

雙柏長何雙字漢偶

宗子 雙柏乃建寧郡屬縣也

穎逸廣漢犍為太守何祇字君肅

郫人

忠懃輔漢將軍張裔字君嗣

成都人

玄寂太常杜瓊字伯瑜

成都人也

侍中常竺字代文

在者舊傳

安南將軍張表字伯遠

成都人也伯父肅廣漢太守兄松字子喬州牧劉璋別駕從事

永昌太守王伉

成都人見蜀書

右八人在劉氏世

五更張霸夫人司馬敬司

成都人也

公乘會婦張氏

廣都人也

犍為楊鳳珪妻陳助

臨邛人也

廣漢便敬賓婦常元常

江原人廣都令常良女也

殷氏婦常靡常

江原人常仲山女也

趙侯夫人常紀常

江原人常侍女

景奇妻羅貢

郫人羅倩女也

趙憲妻何珪

耶人也

朱叔賢妻張昭儀

繁人也

廣柔長姚超二女姚妣饒

耶人也

廣漢王遵妻張叔紀

霸女孫也

右十一人列女

右蜀郡士女七十八人

六十七人十一人女

明略渡沔侯范目

閬中人也

文學聘士洛下宏字長公

閬中人也

玄始侍御史任文孫

閩中人也

文學司空掾任文公

文孫弟也

先生胥君安

見春秋傳首

京兆尹徐誦字子產

閩中人也

忠正侍中譙隆字伯司

閩中人也

高濤太中大夫譙玄字君黃

閩中人也

潔白尚書郎譙瑛

玄子也以易授孝明帝

公車令趙珩字孫明

閩中人也

公府掾趙毅字仲都

瑯子也

公車令臧太伯

宕渠人也
見瑯傳

雋才涼州刺史趙宏字溫柔

閬中人也

右十三人前漢

政事揚州刺史嚴遵字王思

閬中人也

徐州牧嚴羽字子翼

王思子也

長安令王偉卿

王思友見
王思傳

政事大司農玄賀字文和

宕渠人也

將畧大鴻臚龐雄字宣孟

宕渠人也

政事幽州刺史馮煥

宕渠人也

明略使持節車騎將軍馮緄字鴻卿

煥子宕渠人也

降虜都尉馮元字公信

緄弟

尚書郎馮遵字文衡

元子

政事司隸校尉陳禪字紀山

安漢人

漢中太守陳澄

禪子

別駕從事陳實字盛先

澄孫也與王文表為友

思防治中從事楊仁字文義

閩中人

志士荊州刺史龔調字叔侯

安漢人也

忠貞魏郡太守趙晏字平仲

安漢人也

籌畫益州太守李顥字德印

墊江人也見漢書及巴耆舊傳

汝南太守謁煥字

闕江州人也見汝南紀

度遼將軍桂陽太守然溫字

闕江州人見巴耆舊傳

美化越雋太守張翕字叔陽

安漢人也

越雋太守張瑞

翕子也太守王堂察舉孝廉

至孝上蔡令趙邵字泰伯

閩中人也

孝子嚴永

名儒陳髦

隱士黃錯

右三人巴郡太守王堂所進失其官

位見
堂傳

巴郡太守龔楊字

閩人 塾江

茂才孟彪

江州人右並王文表所薦

日南太守黎景字

閩人 塾江

茂才王澹

閩中人見文表傳

文學掾龔策

塾江人

桂陽太守李溫

宕渠人

戶曹掾趙芬

宕渠人

上庸太守陳弘

安漢人
見巴紀

忠義宕渠主簿曲庾

宕渠人也

忠義宕渠主簿馮湛

宕渠人也

烈士郝伯都

閬中人

右三十五人後漢

司隸校尉程烏等失其事不錄

義烈江陽太守程畿字季默

閬中人也

程祁字公弘

畿子也

楊汰字季儒

巴郡人

韓儼

巴西人

黎韜

巴西人三人見楊文然傳

壯烈將軍嚴顏

臨江人也見張飛傳

玄真徵士周舒字叔布

閬中人也

文學儒林校尉周羣字仲直

舒子也

博士周巨

羣子也

雅重車騎將軍育陽景侯黃權字公衡

閬中人在魏儀同三司

尚書郎黃崇

權子也

勇壯折衝將軍西陵太守甘寧字興霸

臨江人仕吳

政事鎮南大將彭亨侯馬忠字德信

閬中人

將略鎮北大將軍安漢侯王平字子均

宕渠人

果壯左將軍宕渠侯句扶字孝興

漢昌人見王平傳

將略盪寇將軍關內侯張嶷字伯岐

南充國人也

尚書僕射姚弋仲字子緒

閬中人見楊義傳諸葛故事也

別駕從事馬勲字盛衡

閩中人見李漢輔臣傳

尚書馬參字承伯

閩中人見蜀書

越雋太守龔祿字德緒

女漢人父諡健為太守見巴紀

鎮軍將軍龔皦字德光

祿弟也

徵士譙岍字榮始

西充國人也周父

淵通散騎常侍城陽亭侯譙周字允南

岍子在劉氏光祿大夫

右二十三人在劉氏三國之世

馬妙祈妻義

貞烈

趙雲君妻華

貞烈

王元憤妻姬

貞烈已上
皆閭中人

趙瑣妻姬

節烈宕
渠人

童女趙英

瑣女也

趙萬妻娥

宕渠人

耿秉妾行

安漢人

鮮尼母姜

安漢人

右八人列女

右巴郡凡士女七十九人

士七十一人
八人女

道德三老楊統字仲通

新都人也曾祖仲續祁
令父春卿為公孫述將

光祿大夫楊博字仲達

統長子

文學侍中楊序字仲桓諡曰文父

博弟

高士冠懽字文儀

綿竹人序弟子也

高士昭約字節宰

雒人也序弟子二人見序傳

術藝使持節交州牧楊宣字君緯

什邡人

學士嚴象

廣漢人宣弟子也

大儒趙翹

廣漢人宣弟子也

烏丸校尉郭堅

雒人也

光祿大夫侍中衛尉鐔顯字子誦

鄆人

廬江太守蔡弓字子騫

雒人

善績司隸校尉郭賀字喬卿

堅孫

永昌太守鄭純字長伯

鄭人也

文學高士王祐字平仲

鄭人也弟灌有文才而不悉行事也

文才樂安相李尤字伯仁

雒人也

尚書郎李充

尤孫也

文才東觀郎李勝字茂通

雒人也見尤傳

公亮將作大匠翟酺字超人

聘士王稚字叔起諡曰憲文

堂少子也

堂長子博

失官位

博子遵

亦失官位

善績蜀郡太守王商字文表

遵子也

隱士夫子段翳字元章

新都人也

隱士馮信字季誠

鄆人

明廉侍御史洛陽令王渙字稚子

鄆人

司隸校尉王堂字敬伯

鄆人

亢烈辟士段恭字節英

新都人也

越雋太守馬顥字叔宰

鄆人

武威太守南陽折侯張江

維人

鬱林太守折國

江四世孫因封國改姓折

高士折象字伯式

國之子也

治中祭酒朱倉字雲卿

什邡人

政事掾柯太守劉寵字世信

綿竹人

孝子江陽符長姜詩字士遊

維人

陰德郡令王忱字少林

新都人也

交州牧羊甚

鄭人也

推讓野王令羊朥字仲魚

甚子

文學侍中董扶字茂安

綿竹人楊厚弟子也

文學聘士任安字定祖

綿竹人亦厚弟子

高讓義士杜真字孟宗

綿竹人

精誠五官諒輔字漢儒

新都人

義士楊寬字叔仲

新都人父斌兄混皆有證明君事失其官位

義士張鉗字子安

廣漢人也

烈士賈栩字元集

什邡人也

節士甯叔字茂泰

廣漢人也

忠義綿竹主簿韓揆字伯彥

壯童左喬雲

綿竹人

孝廉汝敦

新都人

周幹

廣漢人

彭勰

廣漢人

古朴

廣漢人 右三人儒學文才見蜀志及王

商傳

方術太醫丞郭玉字通直

右五十二人馳名漢世

別駕從事李朝字永南

鄭人也

丞相西曹掾李邵字偉南

朝弟也

文才大司農秦宓字子勅

綿竹人也

益州太守王士字義彊

鄭人王祐從弟也

別駕從事王甫字國山

文表弟也

優遊特進太常關內侯鍾承字公文

鄭人也

才雋江陽太守彭萊字永年

廣漢人也

忠謀從事鄭度

綿竹人也
見劉璋傳

忠烈從事王累

新都人也
見劉璋傳

右九人在劉氏世及二牧時

聘士任安母姚

綿竹人也

姜詩妻龐行

雒人也

姜嬪字義舊

綿竹人狄道長姜
穆女司馬雅妻

廖伯妻殷紀配

廣漢人也

便敬妻王和

新都人也

李珥字進娥

郫人李氏女
馮季宰妻也

王輔妻彭非

廣漢人也

李平字正流

廣漢李元女楊文妻

索稚妻相烏

德陽人也

王上妻索福

德陽人也

汝敦妻

失姓不知何郡縣人也

右十一人列女

右廣漢郡凡士女七十二人

六十一人士十一人女

知術光祿大夫關內侯王延世字長叔

資中人

揚州刺史楊莽字翁君

武陽人見何霸傳

忠壯復漢將軍朱遵字孝仲

武陽人也

隱知徵士任永字君業

樊道人也

隱遜合浦太守費貽字奉君

南安人

精密上黨太守趙松字君橋

武陽人

文學城門校尉董鈞字文伯

資中人

秀穎司隸校尉楊渙字孟文

武陽人見捷為耆舊傳

漢中太守楊文方

渙字文方子穎伯冀州刺史仲穎二千石失其行事也

政事司隸校尉楊準字伯邳

文方兄子太守太尉李固舉之

清秀大司空張皓字升明

武陽人也

正直光祿大夫廣陵太守張綱字文紀

皓子也

郎中張植

綱子也

尚書張續

植弟也

豫州牧張方字公始

續弟也

正直司隸校尉趙旂字子鷹

資中人也

別駕從事王元

武陽人也刺史張喬時見楊統傳

義士公車令杜撫字叔和

資中人也

義士新都令趙敦字建侯

武陽人也

孝士尚書郎隗相字叔通

楚道人

呂孟

南安人不詳其事

吳順字叔和

楚道人

學士韓子方

楚道人張貞之師

學士謝褒

南安人見張鉗傳

右二十四人在漢世

政事蜀郡太守關內侯楊洪字季休

武陽人

固率諫議大夫費詩字公舉

南安人

忠正車騎將軍都亭侯張翼字伯恭

武陽人網後也

文學五官中郎將伍梁字德山

南安人

文才射聲校尉楊義字文然

武陽人

右五人在劉氏世

從事賈龍不悉其事不錄

漢中太守楊文方妻陽姬

武陽人

相登妻周度

樊道人也

曹禁字敬姬

南安人周紀妻也

程貞玟字瑗玉

牛鞞人資中張惟妻也

尹仲讓妻韓姜人也

儀成妻謝姬南安人也

趙媛姜資中人也

張貞妻黃帛人也

楊進武陽人也

右九人列女

右健為郡士女凡三十八人二十九人

忠正城陽中尉鄧公成固人也

楊王孫

致遠衛尉博望侯張騫

成固人武帝時

奭朗給事中張猛

騫孫元帝時

高尚逸民鄭子真

褒中人成帝時

大儒李頡

南鄭人

文學司徒李邵字孟節

頡子

執正太尉李固字子堅

邵子

雅望京兆尹李燮字德公

固少子

奉車都尉李歷字季子

固從弟也

善績司隸校尉李法字伯度

南鄭人也

捷為太守趙宣字子雅

南鄭人也

德望廣漢太守趙瑤字元珪

宣子

溫雅尚書趙琰字雅珪

瑤弟

義壯弘農太守陳綱字仲卿

成固人也

義烈從事陳調字元化

綱孫

知思巴郡太守陳雅字伯臺

成固人也

南郡太守程基字稚業

南郡人也

大鴻臚劉巨公

南鄭人也
見烈女傳

廣漢屬國張泰字伯彊

南鄭人也

政事度遼將軍張亮則字元脩

泰從弟

愷悌綿竹令閻憲字孟度

成固人也

隱士樊志張

南鄭人也見征西將軍段熲傳

尚志聘士衛衡字伯梁

南鄭人樊志張弟子也

籌畫計曹史程苞字元道

南鄭人也

文才葭萌長祝龜字元靈

南鄭人也

義烈郡主簿段崇字禮高

南鄭人也

義烈功曹程信字伯義

南鄭人也

嚴孳 李容 陳已 王宗 姜濟 曹廉 勾矩

劉旌

原展

九人太守鄭廣史見段崇程信傳

義烈從事燕邠字元侯

南鄭人

義烈主簿趙嵩字伯高

南鄭人

右三十九人後漢

陳術字申伯

歷二郡太守見蜀書撰益部耆舊傳者

右一人劉氏之世

李穆姜

安衆令程祇妻
李法姑也子基

劉泰瑛

巨公女
楊拒妻

杜泰姬

南鄭人捷為
太守趙宣妻

楊禮珪

成固楊元珍
女陳省妻

李文姬

太尉固女
趙瑛妻

陳順謙

鄧令曹寧妻陳伯臺從女
也兄子陳規著書稱之

陳惠謙

順謙妹度遼將
軍張亮則夫人

張禮脩

南鄭人
趙嵩妻

韓樹南

南鄭人趙
子賤妻也

右九人列女

右漢中郡士女凡四十九人

四十人
九人女

忠義鎮遠將軍義侯文齊字子奇

梓潼人也平帝用為
益州太守遂不服王

莽公孫述
光武嘉之

北海太守文忱

齊子

節士李業字巨遊

梓潼
人也

遂久令李翬

業子

益州太守景毅字文堅

梓潼人也

政事有道景竊字漢伯

梓潼人也

文學孝廉楊充字盛國

梓潼人也

壯烈濟陰相寇祺字宰朝

梓潼人也

壯烈童人李餘

涪人也

義士功曹張壽字伯僖

涪人也

義士王晏字叔博

涪人也

方士李助字翁君

涪人也

右十二人漢世

尚玄諫議大夫杜微字國輔

涪人也

文學李仁字德賢

涪人也

太子僕李異字欽仲

仁子

太子家令尹默字思潛

涪人也

丞相叅軍文恭字仲賢

梓潼人也

果銳前監軍將軍司馬李福字孫德

涪人見諸葛故事蜀書

右六人劉氏世

文極字季姜

梓潼人將作大匠王堂夫人也

巴郡虞顯妻杜慈

涪杜季女也

郭孟妻楊敬

涪楊女也

右列女三人

右梓潼郡士女二十一人

十八人女三人

修慎少府太常關內侯王謀字元泰

漢嘉人也

雲南太守張休

右二人漢嘉人士在劉氏世

文學制州刺史尹珍字道真

母敝人也

巴郡太守傅寶字紀圖

下夷人也

忠義冠軍將軍寧州刺史謝恕字茂理

母敝人也

右三人牂柯人士

忠義大將軍朝侯祭酒錫光字長沖

右一人西域人士

忠義雲南太守陽遷亭侯呂凱字季平

不韋人也

右一人永昌人士

義正安漢將軍建寧太守李恢字德昂

領軍爨習 御史中丞孟獲

右三人建寧人士

輔漢將軍孟琰字休明

右一人朱提人士

先泥和女絡

符人也

右一人列女江陽人

大凡三州十三郡自漢興至三國之終士女載傳記者

三百四十人

二百九十三人
士四十七人女

公七人 大將二十二人 侯二十人 卿佐十四人

侍中七人 尚書五人 司隸校尉六人 州刺史

十三人 郡守四十八人 國師三人 光祿大夫四

人 尚書郎十二人 中書郎將御史六人 公車令

諫議大中十一人 公府辟士八人 高士一人 聘

士七人 徵士四人 節士四人 烈女四十七人

益梁寧三州三國兩晉以來人士目錄

漆立目錄

明畧大司農西域公何攀字惠興

郾人

清秀大長秋壽良字文淑

成都人也

果烈西河太守柳隱字休然

成都人也

梁益二州都督杜禎

成都人也

都督度支巴東太守柳仲字雅厚

成都人也

德行江陽太守何隨字季業

郾人

令德健為太守杜軫字超宗

成都人也

捷為太守杜烈字仲武軫弟

建寧太守杜良字幼倫

益州刺史杜毘字長基

德行給事中任熙字伯遠成都人也

涪陵太守任蕃字憲祖熙子

義正郾令常勗字修業江原人也

州都常忌字茂通勗從弟也

令才太史令高玩字伯珍江原人也

溫才湘東太守常騫字季慎

江原人也

述作武平太守常寬字泰恭

騫從弟也

使持節西夷校尉張岐字紹茂

成都人也

征西將軍西夷校尉益州刺史王異字彥明

成都人也

勇畧雍州刺史南中郎將重安開國侯李陽字文叔

郾人

征虜將軍廣漢梓潼太守楊謙字令志

成都人也

右二十一人蜀郡人在晉世

彊濟少府成都威侯李毅字允剛

郾人

西夷校尉李釗字世康

毅子

仁讓漢嘉太守司馬勝之字興先

綿竹人

德義梓潼太守王化字伯遠

鄭人文表孫

巴東太守王振字仲遠

化弟也

作唐令王岱字季遠

振弟也

述作蜀郡太守王崇字幼遠

岱弟也

素隱中書郎王長文字德雋

鄭人也

建寧太守耿容字宗仲

廣漢人也

右九人廣漢人在晉世

漢中太守李宓字令伯

武陽人也

汶山太守李賜字宗碩

安子也

太傅參軍李典字雋碩

賜弟也

廣漢太守張徵字建興

翼子也

譙國內史費緝字文平

南安人二子見壽良傳

執義衡陽太守楊邠字岐之

武陽人

清正尚書費立字建熙

南安人

右七人捷為人士在晉世

衛尉文立字廣休

臨江人也

武陽太守楊守

臨江人也

牂柯太守毛楚

枳人也

右三人巴郡人在晉世

述作太子中庶子陳壽字承祚

安漢人也

驃騎府掾陳莅字叔度

壽兄子

上黨令陳符字長住

壽兄子

建寧太守陳階字達芝

弟

正直漢中太守閻續字續伯

安漢人

卓畧長水校尉荊州刺史張奕字希祖

南充國人

義烈揚烈將軍梓潼內史譙登字順明

周孫

令德錫令譙周字彥紹

周子見周傳

右八人巴西人士在晉世

清重長水校尉呂淑字偉德

右一人漢中人

廣漢太守李驤字叔龍

福子

右一人梓潼人

忠義江陽太守侯馥字世明

右一人江陽人

三州後賢五十人并前賢三百九十一人

誤曰凡此人士或見漢書或載者舊或見郡紀或在三國書并取其秀異表之斯篇其洪伐張顯者並生附載者齊之其但見名目而不詳其行故或有以傳無珍善

闕之以副直文為實錄矣



華陽國志卷十二

附江原常氏士女志

明 張佳允 輯

侍中長水校尉常洽

字茂尼

侍御史常翊

南廣太守常竺

字代文

閬中令常偉

字公然竺子

廣都令常良

郫令常勗

字修業

河內令常忌

最弟

常仲山

湘東太守常騫

字季慎
偉子

戶曹掾常敞

中郎常美

都護常俊

都護常深

武平太守常寬

字泰恭
騫從弟

治中從事長生

字彭祖
寬子

散騎常侍常璩

字道將
寬族孫

右士十六人

便敬賓婦常元常

良女

殷氏婦常靡常

仲山女

趙侯夫人常紀常

右女三人

佳兒曰江原常氏代有明德故大姓也道將立志僅書

其半豈以私親自嫌哉夫岷瀆委靈哲又作則儻資國
器寸璧是尊今考出土女共十九人自立錄目又見道
將承源家學修辭有經斯龍門世業良史稱材間有行
實詳畧不侔然英名遺烈垂在竹素庶幾尚友遐心著
龜孔邇者矣